

5. PUJIAN SAKARIA KASALAMATATN MPAT KA' TUHAN ALLAH

TEKS: 1:57-80

⁵⁷ Taka' dah sampe bulatnnya Elisabet baranaka', ia maranakatn kamuda' nanglaki. ⁵⁸ Lalu urakng nang basamakatn rumah man ia, mana' kaluarganya nangar kade' Tuhan Allah sidi kasih ka' Elisabet. Ia ka' koa turut karepoatn uga' man Elisabet.

⁵⁹ Wa'tu kamuda' koa baumur lapan ari urakng-urakng ka' koa atakng untu' malaka' kamuda' koa. Ia ka' koa uga' mare'a' kamuda' koa dama Sakaria lea dama apa'nya.

⁶⁰ Tapi jakata we'nya, "Ame! Ia arus ditalah Yohanes."

⁶¹ Tapi urakng ka' koa nyahut, "Tapi na' ada kaluarga kita' badua nang badama lekoa!" ⁶² Lalu make kode urakng ka' koa batanya' ka' Sakaria, dama ahe nang dibare'a' ka' anaknya.

⁶³ Sakaria minta' batu tulis, lalu nyontengan, "Dama kamuda' koa Yohanes." Sigana urakng ka' koa jaji heran. ⁶⁴ Wa'tu koa uga', Sakaria pane ngomong agi' lalu muji Tuhan Allah. ⁶⁵ Urakng-urakng ka' koa jaji heran man gali'. Sigana ahe nang dah jaji koa jaji beber molot urakng ka' sigana daerah panamukng Yudea. ⁶⁶ Sigana urakng nang nangarnya, bapikir, sambil batanya'-tanya': "Jajia' ahe kamuda' koa na'e?" Tagal kuasa Tuhan Allah nyaratai' ia.

⁶⁷ Sakaria apa' dari kamuda' nang baru' dimaranakatn koa, di Roh Tuhan Allah nguasai', lalu ia nyampeatn pasatn mpat ka' Tuhan Allah. Jakata Sakaria koa,

⁶⁸ "Inje' diri' muji Tuhan
Allah bangsa Israel!

Ia dah atakng manto' umat-Nya
man mebasatn ia ka' koa.

⁶⁹ Ia mare' diri' Panyalamat nang kuat,
Ia koa katurunan Daut amba ulutn-Nya.

⁷⁰ Lea janji Tuhan Allah nang de'e,
lewat nabi-nabi nang dah Nya milih,

⁷¹ janji-Nya koa untu' nyalamatatn diri' dari munsuh diri',
man dari kuasa urakng-urakng nang teget ka' diri'.

⁷² Tuhan Allah uga' bakata kade' Ia nojokatnna' kabaikatn ati-Nya ka' ene' uyut diri',
man janji-Nya nang suci koa dah Nya napati' ampeatn.

⁷³⁻⁷⁴ Ia bajanji lekoa ka' Abraham ene' uyut diri'.

Tuhan Allah bajanji untu' mebasatnna' diri' dari kokot munsuh-munsuh diri'
biar diri' bisa baibadah ka' Ia ina' ada rasa gali'.

⁷⁵ Diri' baibadah ka' Ia
sapanyakng idup diri', idup nang suci
man ngarepoatn ati Tuhan Allah."

⁷⁶ Lalu Sakaria bakata ka' anaknya koa,
"Anakku, kao disabuta' nabi Tuhan Allah nang Miah Bakuasa.
Kao di Tuhan Allah ngutus dolo'
yak ngarentes maraga untu'-Nya,

⁷⁷ yak nyampeatn Kabar nang Gagas ka' umat-Nya kade' ia ka' koa disalamatatnna',
tagal Tuhan Allah ngamponia' dosa-dosanya ka' koa.

⁷⁸ Jukut Tuhan Allah diri' sidi miah kasih man sayang.
Untu' nyalamatatnna' diri' Ia ataknga'.

Lea mataari,
nang tarabit ka' alapm ari,

⁷⁹ Ia narakngi' urakng
nang idup basagapm man bayangan kamatiatn,
Ia ngiriknga' diri' ka' maraga kaidupatn
nang miah dame.”

⁸⁰ Anak Sakaria koa sia' aya', uga' sia' kuat imannya man bapikir gagas. Yohanes badiapm ka' abut nang bapaser luas man babatu-batu, sampe atakng wa'tunya ia nyalanan tugas ka' tangah-tengah bangsa Israel.

PAMULAATN

Bayangkan ada pemandangan nang sidi edo', mungkin ka' tapi laut, ato ka' bukit-bukit ato ka' tapi sunge. Kade ngintip ka' pemandangan koa ngalalui' jandela enek, paneleanan diri' sampita'. Diri' ina' dapat marasa kindahatn tempat koa sidi-sidi. Tapi kade' diri' ampus kaluas man badiri' ka' tempat nang tabuka', paneleatn diri' luas, man diri' bisa nikmati keindahan pamandangan koa. Sama uga lea man kasalamatatn nang di Tuhan Allah nyadiaatn. Kasalamatatn koa sidi' luas, bapangaruh ka'sigana kaidupatn diri.kade diri nele' ka' kitab Lukas, ahe maksudnya kasalamatan koa?

NANG DI TALITI

- Ngahe tetangga Sakaria man Elisabet sidi takajut wa'tu nangar kade ia ka' koa marea' dama kamuda koa “Yohanes”? (ayat 57-63).
- Ahe nang jaji wa'tu Sakaria nulisatn "Dama Kamuda koa Yohanes" (ayat 64)
- Lemae tanggapan sigana urakng ka' abut koa nele sigana nang jaji koa? (ayat 65-66)
- Dalapm pujian Sakaria, kasalamatatn koa dari sae? Untu' ahe urakng koa disalamatatn? (ayat 68-75)
- Ahe nang jajia' tugas Yohanes? (ayat 76-77)
- Ahe nang Sakaria pucaya Tuhan Allah panjawata' untu' umatNya ngalalui' Mesias? (ayat 78-79)

NGAGOI MA'NANYA

- Ahe parubahan nang jaji ka' dalapm Sakaria taka' ia bisu' salama sambilan bulatn ?
- Ahe maksudnya “biar diri' bisa baibadah ka' Ia ina' ada rasa gali'. Diri' baibadah ka' Ia sapanyakng idup diri', idup nang suci man ngarepoatn ati Tuhan Allah.”? (ayat 74-75)
- Lemae Yesus koa “Lea mataari, nang tarabit ka' alapm ari”? (ayat 78-79)

PANERAPAN

- Lea ahe kaidupatn urakng “nang idup basagapm man bayangan kamatiatn,”? Dalapm nyanyian nian, situasi koa dibandingkan man “maraga kaidupatn nang miah dame”. Dari kadua gambaran koa, mae nang labih mirip man kaidupatn sodara ampeatn nian ?
- Bagian ahe dalapm pujian Sakaria nang paling nguatatn sodara?

BATUKAR PANDAPAT

- Pikiri seko urakng nang batanya “lemae urakng nang baya disalamatatna”? nele ka' ayat 77-78 lemae sodara nyahutia' ia ka' koa ?

NANG ARUS DIRI' PANJAWAT

- Pikiri saurakng nang palalu nangar tentang kasalamatan dari Tuhan Allah. badoa supaya Tuhan Allah mare' kesempatan untu' ngesahatn tentang Yesus man urakng koa.

DOA

- Basukur tagal kasalamatn nang mpat ka' Tuhan Allah.
- Badoa supaya diri bisa sambayang ka' Tuhan Allah man idup nang suci man ngarepoatn ati Tuhan Allah.